

# INUIT ATAQATIGIIT

## INATSISARTUNI



Nuuk, 16. december 2013

Inatsisartut Suleriaasianni § 37 naapertorlugu Naalakkersuisunut imaattunik apeqquteqarpunga.

(Inatsisartuni ilaasortaq Juliane Henningsen, Inuit Ataqatigiit)

### Apeqqutit:

1. **Nunatsinni imminut toquttarnerup pinaveersaartinneqarnissaanut periusissiaq Inatsisartunut saqqummiunneqaqqammersoq sunik tigussaasunik, suliniutinik aallartitsinermik kinguneqarpa?**
2. **Oqarasuaatikku ulloq unnuarlu saaffissamik pilersitsisoqartariaqarneranik, Inatsisartuni partiit tamarmik isumaqatigiinnerat, Naalakkersuisut qanoq qisuariarfigaat?**
3. **Ulloq suna aallarnerfigalugu innuttaasut imminut toqunnissaminnik ulorianartorsiortut saaffissaaleqisullu oqarasuaatikku saaffiginnissinnaangussappat?**
4. **Naalakkersuisut Nunavut-mmiut iliuusaattut "Embrace Life Council"-ilitut ittumik pilersitsilersaernerlutik?**
5. **Imminut toquttarnermut pinaveersaartitsineq suliassaqaarfittut sumi inissisimava, kiisalu sulisoqarnikkut qanoq pilersaaruteqarfigineqarpa?**
6. **Imminut toquttoqartillugu, inoqarfinni qanigisaasunut aalajangersimasunik periuseqartartarnissaanik Naalakkersuisut tigussaasunik pilersaaruteqarpat?**

### Tungavilersuut:

Inatsisartut ukiaanerani ataatsimiinnsinni Kalaallit Nunaanni imminortarnernik nuna tamakkerlugu pinaveersaartitsinermut periusissiaq 2013-2019 oqaluuseraarput.

Oqallinneq pitsaavoq ilaatigullu partiit tamarmik isumaqatigiissutigaaq suliniutit tigussaasut aallartittariaqartut.

Innuttaasut namminneq kajumissutsiminnik ingerlannikuusaat "Kisimiinngilatit" ajoraluurtumik inuttassaaleqineq pissutigalugu matusariaqarnikuuvoq. Naak 2008-mi "Kisimiinngilatit"-p oqarasuaataanut inuit 358-it sianersimasut oqaloqatigineqarsimallutillu. Taamaatumik akisussaaffik suliassarlu taaNna, inuit namminneq kajumissusertik aallaavigalugu suliarinikuusaat pisortat pisussaaffimmittut tigusariaqaraat isumaqarpunga, oqarasuaatikku saaffissamik pilersitsineq aningaasartuutaasussaammat, tamanna Naalakkersuisut naammassariaqaraat isumaqarlunga.

Taamatuttaa pingaaruteqarpoq, nunat allat qanoq uunga suliassaqaarfimmut periuseqarsimanersut qissimigaassallugit. Canada-mi Nunavut-mi suliniutit arlaqartut maluginiarpakka, ilaatigut Embrace Life Council-imik taasaq nunatsinni atussallugu soqutigintuuvoq. Siunnersuisooqatigeeqarnikkut inuunerup erlinnassusaanik aallaaveqartumik suliniartoqarpat, suliniutinik assigiinngitsunik aallarnisaasartunik.

Neriullunga apeqquteqaatikka ullut suliffiusut qulit iluini akineqarumaartut.